

## Tutu tàchi racha'nu Paulu nuu Filemón

### *Paulu tãa ra tutu i'ya kuenda Filemón*

<sup>1</sup> Yu'u Paulu ra indii tichi vekaa cha'a' Racha'nu Jesucristu, tàì tutu i'ya chi'in ra yanio Timoteu kuendaun yo'o Filemón, vati yo'o kùun iin ra mañeru ndi, ra ya'a va'a ña jàtiñu chi'in ndi.

<sup>2</sup> Tãa ndi ma tutu i'ya kuenda ndisaa ma ñivi Ndioo ña kùti'vi ma ve'un. Takua kùu ma ña ta'an yo Apia chi'in ra yanio Arquipu, ra jàtiñu nduva'a kuii chi'in yo cha'a' ma tu'un Ndioo.

<sup>3</sup> Yakan va na ja'a ma Racha'nu Ndioo Tatá yo chi'in ma Racha'nu Jesucristu ña na koo va'a ndo chi'in ma anima ndo. Ta juuni na jakoyo ra ñamani ra chata ndo, ikan na koo vii ndo vati ya'a kùuni ndi nde'e ndi ndo.

### *Paulu kà'an ra cha'a' Filemón nuu Ndioo*

<sup>4</sup> Tandì'i kivi ora chà'i ta'vindioo nuu ma Racha'nu Ndioo chito'i juuni kà'in nuu ra cha'un ndia. <sup>5</sup> Vati cha chìnitù'in ña ya'a chìnuniun tu'un Racha'nu Jesucristu, ta ya'a kùuniun nde'un ndisaa ma ñivi ìyo kuenda Ndioo ndia.

<sup>6</sup> Yakan va ora kà'in chi'in ma Racha'nu Ndioo juuni kàtitu'in naja kua jã'un ña chìnuniun ma tu'un ra, ta naja kua jã'un ña kàtitu'un yi nuu ma ñivi. Takan ìyo yi ña jana'un nuu ndisaa ma ñivi, ikan na koto kachin gaun naja kua ìyo íí yo jã'a ma Racha'nu Jesucristu. <sup>7</sup> Yakan va cha'a' yakan kùu yi ña ya'a chìsiì ta va'a kùunì jà'un yo'o yani, vati ya'a kùuniun nde'un ma ndian

kùu ta'an yo, ta janiniun ta chà'un tundeeni nuu na ña na chinuni na tiaga.

*Paulu chìkan ra ñamani nuu Filemón kuenda ma ra nàni Onésimu*

<sup>8</sup> Yakan va vaji tatun Cristu kùu ta kùu ndakain ña na ja'un ma tiñu ìyo yi ña ja'un, vati chā'a ra ma ndatu ra nui, <sup>9</sup> va kùunì ña va'a ga ña na jàninì ñun chi'in ma tu'un vii cha'a' ña kùuniun nde'un yu'u indukuni kua kùunì nde'i ñun. Ta yu'u Paulu jin iin ra cha chicha kùu, ta vitin juuni indìjì vekaa cha'a' ña iin ra kà'an cha'a' ma Racha'nu Cristu Jesuu kùu. <sup>10</sup> Ta cha'a' yakan vitin chikain iin ñamani nuun cha'a' ma ra nàni Onésimu, vati rakan cha kùu ra takua kùu iin ra se'i vitin, cha'a' ña kicha'a ra chinuni ra tu'un Jesucristu nuu indii ra chi'in ma tichi vekaa i'ya.

<sup>11</sup> Vati ma ora ña Onésimu kùu ra musun niku, na tükuii va'a jā'a ra, va vitin kùu yi ña ni jatiñu va'a ra chi'un takua jàtiñu ra chi'in vitin.

<sup>12</sup> Yakan va vitin tàchi ndikoi ra nuun, ta kùunì ña na ki'in kuendaun ra takua jà'un chi'in ndia.

<sup>13</sup> Ta vaji yu'u chàninì ña na kindoo ra chi'in ña tìndee ra yu'u ma tichi vekaa tiñu nuun ña juuni yanga ña indìjì ma i'ya cha'a' ña kàtitu'in ma tu'un va'a. <sup>14</sup> Va nī kuunì ja'i ma kua ikan tu töve ku'va ji'naun ndatu ña va'a yi. Ta juuni kùunì ña na ku'vaun ndatu ña na ndoo ra, va töve cha'a' ña janinì ñun kùu yi, vati cha'a' ña kùuni maun kùu yi. <sup>15</sup> Nda kèsiin ma Onésimu chi'un ta ndàkoo ra ñun tia tiempuni, ikan ma tiá iti' nuu ni koo ra chi'un endeeni. <sup>16</sup> Va vitin ta iti' nuu na yüva ra musun ni kuu ra, ti ra va'a ga kùu ra vitin cha'a' ña chìnuni ra. Iin ra nduva'a yó

kuuni nde'e kùu ra. Yakan va yu'u kùuni nde'i ra, ta yo'o va ìyo ga yi ña kùuniun nde'un ra. Yakan va na kuuniun nde'un ra takua kùu ma ndian yaniun ña chìnuni takua chìnuni yo'o.

<sup>17</sup> Yakan va tu kùuniun nde'un yu'u takua iin merun, ta juuni kua ikan ìyo yi ña kuuniun nde'un ra ndia. <sup>18</sup> Tatu ìyo iin ña tüvi va'a jā'a ra, a tàvi ra nuun ora chiyo ra chi'un niku, na naka'un yi nuu yu'u. <sup>19</sup> Ta chi'in ma tu'un i'ya ña yu'u tàì yi juuni chi'in nda'i ña juuni chà'i tu'un nuun ña ni ka'ndai ma kuenda ña tàvi ra nuun, tuva takan kùu yi. Va ìyo yi ña kuku'uniun ña ndisaa ma ña ìyo nuun kùu ma ña tàviun nui. <sup>20</sup> Yakan va chikain ñamani nuun, yo'o yani, ña na ku'vaun tundeeni yu'u, ikan na sii kùuni kuenda ma Cristu, vati juuni ma ra chìnuni kùun ndia.

<sup>21</sup> Ta cha'a' yakan kùu yi ña cha chìto va'i ña ni ja'un takua kà'in nuu ma tutu i'ya. Ta juuni ni ja'un tiaga kua'a' ma ña va'a ña kà'in chi'un tiá iti' nuu ndia. <sup>22</sup> Ta yüvi ña'ani kùu yi vati juuni kùuni ña na jandova'un ma nuu koi chi'un ndia. Vati ndatui ña na ku'va Ndioo ña na kei nuu indii, ikan na kuu kunde'i ñun vati chitói ña endee kà'un chi'in ra cha'i ña takan ni kuu yi.

*Ma tu'un nuu ndi'inia ña kà'an Paulu kuenda Filemón*

<sup>23</sup> Takani kùu yakan va ma ra nàni Epafra, ra indii vekaa chi'in cha'a' ma Racha'nu Cristu Jesuu, juuni tàchi ra iin saludu nuun, <sup>24</sup> Ta takani Marku, Aristarcu, Dema ta Luka tàchi ndra saludu nuun ndia, vati ndra'ya kùu ndra

ña tìndee ndra yu'u ña jà'a ndra ma tiñu nuu Ndioo.

<sup>25</sup> Ta ma Racha'nu Jesucristu na koso ra ma ñamani ra chata ndisaa ndo. Ta takan na kuu yi. Amén.

**Zacatepec Mixtec NT**  
**Mixteco, Santa María Zacatepec: Zacatepec Mixtec**  
**NT New Testament**

copyright © 2015 Wycliffe Bible Translators, Inc.

Language: Mixtec, Santa María Zacatepec

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

55b3808f-9cd0-5da9-90f0-a96c172e0e02